

四庫全書

集部

欽定四庫全書

樂府詩集卷十

宋 郭茂倩 輯

郊廟歌辭

隋太廟歌

隋書樂志曰文帝開皇中詔牛弘姚察許
善心虞世基劉臻等詳定雅樂并換歌辭
其太廟歌辭有迎神歌登歌俎入歌皇高

祖太原府君皇曾祖康王皇祖獻王皇考
太祖武元皇帝四室歌飲福酒歌送神歌
其俎入歌飲福酒歌並郊丘社廟同用

迎神歌

務本興教尊神體國霜露感心享祀陳則官聯式序奔
走在庭几筵結慕裸獻惟誠嘉樂載合神其降止永言
保之錫以繁祉

登歌

孝熙嚴祖師象敬宗惟皇肅事

肅一作

有來雝雝雝梁霞

複繡榛雲重觀德自感奉璋伊恭彝尊盡飾羽綴有容
升歌發藻景福來從

俎入歌

祭本用初祀由功舉駿奔咸會供神有序明酌盈樽豐
犧實俎幽金既薦續錯維旅享由明德香非稷黍載流
嘉慶克固鴻緒

太原府君歌

締基發祥肇源興慶迺仁迺哲克明克令庸宣國圖善
流人詠開我皇業七百同盛

康王歌

皇條俊茂帝系靈長豐功疊軌厚利重光福由善積代
以德彰嚴恭盡禮永錫無疆

獻王歌

盛才必達丕基增舊涉渭同符遷邠等構宏風邁德義
高道富神鑒孔昭王猷克懋

太祖歌

深仁冥著至道潛敷皇矣太祖耀名天衢翦商隆祚奄
宅隋區有命既集誕開靈符

飲福酒歌

神道正直祀事有融肅雝備禮莊敬在躬羞燔已具奠
酌將終降祥惟永受福無窮

送神歌

饗禮具利事成佇旒冕肅簪纓金奏終玉俎撤盡孝敬

窮嚴絜人祇分哀樂半降景福憑幽贊

唐享太廟樂章

唐書樂志曰貞觀中享太廟樂迎神用永和九變詞同皇帝行用太和登歌酌鬯用肅和迎俎用雍和獻皇祖宣簡公皇祖懿王同用長發之舞景皇帝用大基之舞元皇帝用大成之舞高祖用大明之舞皇帝飲福用壽和送文舞出迎武舞入用舒和

武舞用凱安撤俎用雍和送神用永和其
太和凱安詞同冬至圜丘並魏徵褚亮等
作

永和

於穆烈祖弘此丕基永言配命子孫保之百神既洽萬
國在茲是用孝享神其格思

肅和

大哉至德允茲明聖格于上下聿遵誠敬嘉樂斯登鳴

球以詠神其降止式隆景命

雍和

崇茲享祀誠敬兼至樂以感靈禮以昭事染盛咸絜牲
牲孔備永言孝思庶幾不匱

長發舞

唐會要曰貞觀十四年詔用顏師古許敬
宗議皇祖宣簡公懿王廟並奏長發之舞
取詩云濟哲惟商長發其祥也

濬哲維唐長發其祥帝命斯祐王業克昌配天載德就
日重光本枝百代申錫無疆

大基舞

猗與祖業皇矣帝先翦商德厚封唐慶延在姬猶稷方
晉踰宣基我鼎運於萬斯年

大成舞

周稱王季晉美帝文明明盛德穆穆齊芳藏用四履屈
道參分鏗鏘鍾石載紀鴻勳

大明舞

唐會要曰貞觀十四年詔用顏師古等議
高祖廟奏大明之舞取易曰大明終始六
位時成詩有大明之篇稱文王有明德也
五紀更運三正遞升勛華既沒禹湯勃興神武命代靈
睽是膺望雲彰德察緯告徵上紐天維下安地軸徵師
涿野萬國咸服偃伯靈臺九官允穆殊域委賁懷生介
福大禮既飾大樂已和黑章擾圉赤字浮河功宣載籍

德被詠歌克昌厥後百祿是荷

壽和

八音斯奏三獻畢陳寶祚惟永暉光日新

舒和

聖敬通神光七廟靈心薦祚和萬方嚴禋克配鴻基遠
明德惟馨鳳歷昌

雍和

於穆清廟聿修嚴祀四縣載陳三獻斯止遵豆撤薦人

金匱要略卷十
祇介祉神惟格思錫祚不已

永和

肅肅清祀烝烝孝思薦享昭備虔恭在茲雍歌撤俎祝嘏陳辭用光武志永固鴻基

唐享太廟樂章

唐書樂志曰高宗永徽已後續造享太廟樂章獻太宗用崇德之舞高宗用鈞天之舞中宗用太和之舞睿宗用景雲之舞皇

祖宣皇帝用光大之舞舊樂章宣元二宮
同用長歎其詞亦同開元十年始別造詞
而宣帝更用光大云

崇德舞

五運改卜千齡啓聖彤雲曉聚黃星夜映葉闌珠囊基

開玉鏡

後為
圖開

下臨萬寓上齊七政霧開三象塵清九服

海濂星暉遠安邇肅天地交泰華夷輯睦翔泳歸仁中

外提

一作
綏

福績踰黜夏敷高翦商武陳七德刑設三章

祥禽巢閣仁獸遊梁卜年惟永景福無疆

鈞天舞

承天撫籙纂聖登皇遐清萬寓仰協三光功成日用道
濟時康璇圖載永寶歷斯昌日月揚暉烟雲爛色河嶽
修貢神祇效職舜風攸偃堯曦先就膚感通寰孝思洽
宙奉揚先德虔遵曩狩展義天扃飛英雲岫化逸王表
神凝帝先乘雲厭俗馭日登玄

太和舞

廣樂既備嘉薦既新述先惟德孝饗惟親七獻具舉五
齊畢陳錫茲祚福於萬斯春

景雲舞

惟睿作聖惟聖登皇精感耀魄時膺會昌舜慙大孝堯
推讓王能事斯極振古誰方文明履運車書同軌魏巍
赫赫盡善盡美衢室凝旒大庭端宸釋負之寄事光復
子脫屣高天登遐上玄龍湖超忽象野羊綿遊衣復道
薦果初年新廟弈奕明德配天

光大舞

大業龍祉徽音駿尊潛居皇德赫嗣天昆展儀宗祖重
誠孝孫春秋無極享奏存存

唐享太廟樂章

唐書樂志曰太樂舊有享太廟迎神次金
奏及送神辭三章不詳所起

迎神

七廟觀德百靈攸仰俗荷財成物資含養道光執契化

龍提象肅肅雍雍神其來饗

金奏

肅肅清廟巍巍盛唐配天立極累聖重光樂和管磬禮
備烝嘗永惟來格降福無疆

送神

五聲備奏三獻終祠車移鳳輦旆轉紅旂禮周籩豆誠
效虔祇皇靈徙蹕簪紳拜辭

唐武后享清廟樂章

第一

建清廟贊玄功
擇吉日展禋宗樂已變禮方崇
望神駕降仙宮

第二

隆周創業寶命惟新
敬宗茂典爰表虔禋
聲明已備文物斯陳
肅容一作雍如在懇志方申

第三登歌

肅敷大禮上謁尊靈
敬陳筐幣載表丹誠

第四迎神

致奠蘋藻式罄虔襟絜誠斯展停降靈歆

第五飲福

爰陳玉醴式奠瓊漿靈心有穆介福無疆

第六送文舞

帝圖草創主業初開功高佐命業贊雲雷

第七迎武舞

赫赫玄功被穹壤皇皇至德洽生靈開基撥亂祆氛廓

佐命宣威海內清

第八舞樂作

荷恩承顧託執契恭臨撫廟略靜邊荒天兵耀神武

第九撤俎

登歌已闋獻禮方周欽承景福肅奉鴻休

第十送神

大禮言畢仙衛將歸莫申丹懇空瞻紫微

唐享太廟樂章

唐書樂志曰中宗神龍元年享太廟樂迎
神用嚴和九變詞同皇帝行用昇和登歌
裸鬯用虔和迎俎用歆和光皇帝酌獻用
長發景皇帝酌獻用大基元皇帝酌獻用
大成高祖酌獻用大明太宗酌獻用崇德
五室舞詞並同貞觀高宗酌獻用鈞天舞
詞同光宅孝敬皇帝酌獻用承光皇帝飲
福用延和送文舞出迎武舞入用同和武

舞用寧和撤俎用恭和送神用通和皇后
助享皇后行用正和詞同貞觀中宮朝會
登歌奠鬯用昭和皇后酌獻飲福用誠敬
撤俎用肅和送神用昭感

嚴和

肅肅清廟赫赫玄猷功高萬古化奄十洲中興丕業上
荷天休祇奉先構禮被懷柔

昇和

顧惟菲薄纂歷應期中外同執四國來思樂用當德禮
以陳詞夕惕若厲欽奉宏基

虔和

禮標薦鬯肅事詞庭敬申如在敢託非馨

歆和

崇禋已備藻盛聿脩絜誠斯展鍾石方道

承光舞

金相載穆玉裕重輝養德青禁承光紫微乾宮候色震

象增威監國方永賓天不歸孝友自哀溫文性與龍樓
正啓鶴駕斯舉丹宸流念鴻名式序中興考室永陳彝
俎

延和

巍巍累聖穆穆重光奄有區夏祚啓隆唐百蠻飲澤萬
國來王本枝億載鼎祚逾長

同和

惟聖配天敷盛禮惟天為大闡洪名恭禋展敬光先德

蘋藻申虔表至誠

寧和

炎馭失天

一作王

綱土德承天命英猷被寰宇懿躅隆邦

政七德已綏邊九夷咸底定景化覃遐邇深仁洽翔泳

恭和

禮周三獻樂闋九成肅承靈福悚惕兼盈

通和

祠容既畢仙座爰興停停鳳舉藹藹雲昇長隆寶運永

錫休徵福覃貽厥恩被黎蒸

昭和

道洽二儀交泰時休四寓和平環佩肅於庭實鍾石揚
乎頌聲

誠敬

顧惟菲質忝位椒宮虔奉蘋藻肅事神宗敢申誠絜庶
罄深衷眸容有裕靈享無窮

肅和

月禮既周雲和將變爰獻其醕載遷其奠明德逾隆非
馨是薦澤霑動植仁覃寓縣

昭感

鏗鏘韶護肅穆神容洪規赫赫祠典雍雍已周三獻將
乘六龍虔誠有託懇志無從

唐享太廟樂章

張說

唐書樂志曰玄宗開元七年享太廟樂迎
神用永和皇帝行用太和登歌酌瓊用肅

和迎俎用雍和皇帝酌醴齊用文舞獻宣
皇帝用光大舞光皇帝用長發舞景皇帝
用大政舞元皇帝用大成舞高祖用大明
舞太宗用崇德舞高宗用鈞天舞中宗用
大和舞睿宗用景雲舞皇帝飲福受脰用
福和送文舞出迎武舞入用舒和亞獻終
獻行事武舞用凱安撤豆用登歌送神用
永和按景皇帝舊用大基至是改用大政

云

永和三首

肅九室諧八音歌皇慕動神心禮宿設樂妙尋聲明備
裸奠臨

律逐氣音入玄依玉几御黼延聆愜息優周旋九韶遍
百福傳

信工祝永頌聲來祖考聽和平相百辟貢九瀛神休委
帝孝成

太和

時文聖后清廟肅邕致誠勤薦在貌思恭玉節肆夏金
鏘五鍾繩繩雲步穆穆天容

肅和

天子享孝工歌溥將射裸鬱鬯乃焚膋薌臭以達旨聲
以求陽奉時烝嘗永代不忘

雍和二首

在滌嘉蒨麗碑敬牲角握之牝色純之駢火傳陽燧水

溉陰精太公胖俎傳說和羹

俎豆有馥齋盛絜豐亦有和羹既戒既平鼓鍾管磬肅
唱和鳴皇皇后祖我來思成

文舞

聖謩九德真言五千慶集昌胤開帝先高文杖鉞克
配彼天三宗握鏡六合渙然帝其承祀率禮罔愆圖書
霧出日月清懸舞形德類詠諡功傳黃龍蜿蜒彩雲蹕
躔五行氣順八佾風宣介此百福於皇萬年

光大舞

肅肅摯祖滔滔濬源有雄王劔作鎮金門玄王貽緒后
稷謀孫肇禋九廟四海來尊

長發舞

具禮崇德備樂承風魏推幢王周贈司空不行而至無
成有終神興王業天歸帝功

大政舞

於赫元命權輿帝文天齊八柱地半三分宗廟觀德笙

鏞樂勲封唐之兆成天下君

大成舞

帝舞季歷龍聖生昌后歌有螭胎炎孕黃天地合德日月齊光肅雍孝享祚我萬方

大明舞

赤精亂德四海困窮黃旗舉義三靈會同早望春雨雲披大風溥天來祭高祖之功

崇德舞

皇合一德朝宗百神削平天地大拯生人上帝配食單
于入臣戎歌陳舞曄曄震震

鈞天舞

高皇邁道端拱無為化懷獯鬻兵賦勾驪禮尊封禪樂
盛來儀合位媯后同稱伏羲

太和舞

遐居江水鬱起丹陵禮物還舊朝章中興龍圖友及駿
命恭膺鳴球香瓚大禧是承

景雲舞

景雲霏爛告我帝符噫帝冲德與天為徒笙鏞遠俎
豆虛無春秋孝獻迴復此都

福和

備禮用樂崇親致尊誠通慈降敬徹爰存獻懷稱壽啐
感承恩皇帝孝德子孫千億大包天域長亘不極

舒和

六鍾翕協六變成八佾倘佯八風生樂九韶兮人神感

美七德兮天地清

凱安四首

瑟彼瑤爵亞維上公室如屏氣門不容躬禮殷其本樂
執其中聖皇永慕天地幽通

禮匝三獻樂遍九成降循軒陛仰歆皇情福與仁合德
因孝明百年神畏四海風行

總總千戚填填鼓鍾奮揚增氣坐作為容離若鷺鳥合
如戰龍萬方觀德肅肅邕邕


烈祖順三靈文宗威四海黃鉞誅羣盜朱旗掃多罪戢
兵天下安約法人心改大哉干羽意長見風雲在

登歌

止笙磬撤豆籩廓無響官入玄主在室神在天情餘慕
禮罔愆喜黍稷屢豐年

永和

渺嘉樂授靈爽感若來思如往休氣散迴風上返寂寞
還惚恍懷靈駕結空想



樂府詩集卷十

欽定四庫全書

集部

樂府詩集卷十三

詳校官庶吉士臣柳邁祖

助教臣常循覆勘

總校官知縣臣繆琪

校對官編修臣秦瀛

謄錄監生臣孫永基

欽定四庫全書

樂府詩集卷十一

郊廟歌辭

唐享太廟樂章

唐書樂志曰代宗寶應已後續造享太廟
樂章獻玄宗用廣運之舞肅宗用惟新之
舞代宗用保大之舞德宗用文明之舞順

宋 郭茂倩 輯

宗用大順之舞憲宗用象德之舞穆宗用
和寧之舞武宗用大定之舞昭宗用咸寧
之舞宣宗懿宗有舞詞而名不傳

廣運舞

郭子儀

於赫皇祖昭明有融惟文之德惟武之功河海靜謐車
書混同虔恭孝饗穆穆玄風

惟新舞

劉晏

漢祚惟永神功中興風驅氛祲天覆黎蒸三光再朗庶

績其凝重熙累葉景命是膺

保大舞

郭子儀

於穆文考聖神昭彰簫勺羣慝含光遠方萬物茂遂九
夷賓王懌懌雲韶德音不忘

文明舞

鄭餘慶

開邸除暴時邁勛尊三元告命四極駿奔金枝翠葉輝
燭瑤琨象德億載貽慶湯孫

大順舞

鄭絪

於穆時文受天明命允恭玄默化成理定出震嗣德應
乾傳聖猗與緝熙千億流慶

象德舞

段文昌

肅肅清廟登顯至德澤周八荒兵定四極生物咸遂羣
盜滅息明聖欽承子孫千億

和寧舞

牛僧孺

湜湜頤頤融昭德輝不紐不舒貫成九圍武烈文經敷
施當宜纂堯付啟億萬熙熙

大定舞

李回

受天明命敷祐下土化時以儉衛文以武氛消夷夏俗
臻往古億萬斯年形于律呂

宣宗舞

夏侯孜

於鑠令主聖祚重昌興起教義申明典章俗尚素朴人
皆樂康積德可報流慶無疆

懿宗舞

蕭倣

聖祚無疆慶傳樂章金枝繁茂玉葉延長海瀆常晏波

濤不揚汪汪美化垂範今王

咸寧舞

於鑠丕嗣惟帝之光羽籥象德金石薦祥聖系無極景
命永昌神降上哲維天配長

唐太清宮樂章

唐書禮儀志曰玄宗開元二十年正月詔
兩京諸州置玄元廟天寶二年三月以西
京玄元廟為太清宮其樂章降仙聖奏煌

煌登歌發爐奏冲和上香畢奏紫極舞撤
醺奏登歌送仙聖奏真和會要曰太清宮
薦獻聖祖玄元皇帝奏混成紫極之舞

煌煌

煌煌道宮肅肅太清禮光尊祖樂備充庭罄竭誠至希
夷降靈雲凝翠蓋風馭紅旌衆真以從九奏初迎永惟
休祐是錫和平

冲和

虛無結思鍾磬和音歌以頌德香以達心禮殊裸鬯義
感昭臨雲車至止慶垂悃悃

香初上

肅肅我祖繇繇道宗至感潛達靈心暗通雲駢御氣芝
蓋隨風四時禋祀萬國來同

再上

仙宗績

一作積

道我李承天慶深虛極符光象先俗登仁

壽化闡螭涓五千貽範億萬斯年

終上

不宰元功無為上聖洪源長發誕受天命金奏迎真璇
宮展盛備禮周樂垂光儲慶

紫極舞

至道生元氣重圓法混成無為觀大象沖用體常名仙
樂臨丹闕雲車出玉京靈符百代應瑞節九真迎寶運
開皇極天臨暎太清長垂一德慶永庇萬方寧

序入破第一奏

真宗開妙理冲教統清虛化演無為日言昭有象初瑤
壇肅靈瑞金闕映仙居一奏三清樂長回八景輿

第二奏

虛極仙宗本希夷象帝先百靈朝太上萬法祖重圓善
貸惟冲德功成謂自然雲門達和氣思用合鈞天

第三奏

元符傳紫極寶祚啟高真道德先垂裕冲和已化淳人
風齊太古天瑞叶惟新仙樂清都上長明交泰辰

登歌

嚴禋展事禮潔蒸嘗皇矣聖祖德惟馨香盛薦既撤歌
工再揚大來之慶降福穰穰

真和

玉磬含響金鑪既馥風馭泠泠雲壇肅肅杳一作歸大
象霈流嘉福俾寧萬邦無思不服

唐德明興聖廟樂章

李舒

唐書禮儀志曰玄宗天寶二年三月追尊

臯繇為德明皇帝涼武昭王為興聖皇帝
其廟樂第一迎神第二登歌奠幣第三迎
俎第四酌獻第五亞獻終獻第六送神

迎神

元尊九德佐堯光宅烈祖太宗方周作伯響懷霜露樂
變金石白雲清風鬋鬋來格

登歌奠幣

四時有典百事來祭尊祖奉宗嚴禋大帝禮先蒼壁奠

備黜制於萬斯年熙成帝系

迎俎

盛牲實俎涓選休成鼎燬陽燧玉盟陰精有飴嘉豆既
和大羹侑以清樂細齊人情

德明酌獻

清廟弈弈和樂雍雍器尊犧象禮屬宗公白水方裸黃
流在中謨明之德萬古清風

興聖酌獻

閔宮靜謐合樂周張泰尊始獻百末重觴震澹存誠庶
幾迪嘗遙源之祚天漢靈長

亞獻終獻

惟清惟肅靡聞靡見舉備九成俛終三獻慶彰曼壽昨
撤嘉薦瘞玉埋牲禮神斯徧

送神

元精回復靈貺繁滋風灑蘭路雲搖桂旗高丘緬邈涼
部逶遲瞻望靡及纏綿永思

唐儀坤廟樂章

唐書樂志曰儀坤廟樂迎神用永和次金
奏皇帝行用太和酌獻登歌用肅和迎俎
用雍和肅明皇后室酌獻用昭升昭成皇
后室酌獻用坤貞飲福用壽和送文舞出
迎武舞入用舒和武舞用安和撤俎用雍
和送神用永和

永和

徐彥伯

猗若清廟肅肅熒熒國薦嚴祀坤興淑靈有几在室有
樂在庭臨茲孝享百祿惟寧

金奏

陰靈効祉軒曜降精祥符淑氣慶集柔明瑤俎既列雕
桐發聲徽猷永遠比德皇英

太和

丘說

孝哉我后冲乎迺聖道映重華德輝文命慕深視篋情
殷撫鏡萬國移風兆人承慶

肅和

張齊賢

裸圭既濯鬱鬯既陳畫幕雲舉黃流玉醇儀充獻酌禮
盛衆禋地察惟孝愉馬饗親

雍和

鄭善玉

酌鬱既濯取蕭方焚邊豆靜器簋簋芳飴魚腊薦美牲
牲表絜是戢是將載迎載列

昭升

薛稷

陽靈配德陰魄昭升堯壇鳳下漢室龍興倪天作對前

疏是凝化行南國道盛西陵造舟既灌無德而稱我梁
既潔我醴既澄陰陰靈廟光靈若憑德馨惟饗孝思烝
烝

坤貞

乾道既亨坤元以貞肅雍攸在輔佐斯成外睦九族內
光一庭克生叡哲祚我休明欽若徽範悠哉淑靈建茲
清宮于彼上京縮茅以獻絜秬惟馨實受其福斯乎億
齡

壽和

徐堅

於穆清廟肅雍嚴祀合福受釐介以繁祉

舒和

胡雄

送文迎武遞參差一始一終光聖儀四海生人歌有慶
千齡孝享肅無虧

安和

劉子玄

妙算申帷幄神謀出廟庭兩階文物備七德武功成
技獵長楊苑屯軍細柳營將軍獻凱入歌舞溢重城

雍和

員半千

孝享云畢維撤有章雲感玄羽風懷素商瞻望神座祇
戀匪遑禮終樂闋肅雍鏘鏘

永和

祝欽明

一缺
姓氏

閔宮實實清廟徽徽降格無象馨香有依式昭纂慶方
融嗣徽明禋是享神保聿歸

唐儀坤廟樂章

唐書樂志曰太樂又有儀坤廟樂章與前

略同而有迎神送神二章無徐彥伯祝欽
明之詞

迎神

月靈降德坤元授光娥英比秀任姒均芳瑤臺薦祉金
屋延祥迎神有樂歆此嘉薌

送神

玉帛儀大金絲奏廣靈應有孚冥徵不爽降彼休福歆
茲禋享送樂有章神麾其上

唐昭德皇后廟樂章

唐書樂志曰昭德皇后廟樂迎神用永和
登歌酌匱用肅和迎俎用雍和酌獻用坤
元飲福用壽和送文舞出迎武舞入用舒
和武舞用凱安撤俎用雍和送神用永和
其辭內出

永和

穆清廟薦嚴禋昭禮備和樂新望靈光集元辰祚無極

享萬春

肅和

誠心達娛樂分升蕭管鬱氛氤芳既縮匱既薰
福如雲

雍和

我將我享盡明而誠載芬黍稷載滌犧牲懿矣元良萬
邦以貞心乎愛敬若覩容聲

坤元

卷十一
於穆先后儷聖稱崇母臨萬寓道被六宮昌時協慶理
內成功殷薦明德傳芳國風

壽和

工祝致告徽音不遐酒醴咸旨馨香具嘉受釐獻祉永
慶邦家

舒和

金枝羽部輟清歌瑤堂肅穆笙磬羅諧音遍響合明意
萬類昭融靈應多

凱安

辰位列四星帝功參十亂進賢勤內輔扈蹕清多難承
天厚載均並曜宵光燦留徽藹前躅萬古披圖煥

雍和

公尸既起享禮載終稱歌進撤盡敬由衷澤流惠下大
小咸同

永和

昭事終幽享餘移月御返仙居璇庭寂靈幄虛顧徘徊

感皇儲

唐讓皇帝廟樂章

李舒

迎神

皇矣天宗德先王季因心則友克讓以位爰命有司式
遵前志神其降靈昭饗祀事

奠幣

惟帝時若去而上僊祀用商武樂備宮懸白壁加薦玄
纁告虔子孫拜後承茲吉蠲

迎俎

祀盛體薦禮協粢盛方周假廟用魯純牲捧撤祇敬擊拊和鳴受釐歸胙既戒而平

酌獻

八音具舉三壽既盟潔茲宗彝瑟彼圭瓚蘭有重錯椒醕飄散降祚維城永為藩翰

亞獻終獻

秩禮有序和音既同九儀不忒三揖將終孝感藩后相

維辟公四時之典永永無窮

送神

奠獻已事昏昕載分風搖雨散靈衛絀緼龍駕帝服上
一作騰騰五雲泮宮復閔寂寞無聞

唐享隱太子廟樂章

唐書樂志曰貞觀中享隱太子廟樂迎神
用誠和登歌奠玉帛用肅和迎俎用雍和
送文舞出迎武舞入用舒和武舞用凱安

送神用誠和詞同迎神

誠和

道閔鶴關運纏鵠里門集大命俾歆嘉祀禮亞六瑚誠
殫二簋有誠顯若神斯戾止

肅和

歲肇春宗乾開震長瑤山既寂戾園斯享玉肅其事物
昭其象絃誦成風笙歌合響

雍和

明典肅陳神居遂啟春伯聯事秋官相禮有來雍雍登
歌濟濟緬惟王宅庶歆芳醴

舒和

三縣已判歌鐘列六佾將開羽鉞分尚想燕飛來蔽日
終疑鶴影降凌雲

凱安

天步昔將開商郊初欲踐撫戎金陣廓貳極瑤圖闡雞
戟遂崇儀龍樓期好善弄兵隳震業啓聖隆祠典

唐享隱太子廟樂章

唐書樂志曰太樂舊有隱太子廟迎送神
辭二章不詳所起

迎神

蒼震有位黃離蔽明江充禍結戾據灾成銜冤昔痛贈
典今榮享靈有秩奉樂以迎

送神

皇情悼往祀儀增設鐘鼓鏗鏘羽旄昭晰掌禮云備司

筵告徹樂以送神靈其鑒閔

樂府詩集卷十一

欽定四庫全書

樂府詩集卷十二

宋 郭茂倩 輯

郊廟歌辭

唐享章懷太子廟樂章

唐書樂志曰神龍初享章懷太子廟樂章
第一迎神第二登歌酌鬯第三迎俎及酌
獻第四送文舞出迎武舞入第五武舞作

第六送神詞同隱廟

迎神

副君昭象道應黃離銅樓備德玉裕成規仙氣靄靄靈
從師師前驅戾止控鶴來儀

登歌酌鬯

忠孝本著羽翼先成寢門昭德馳道為程幣帛有典容
衛無聲司存既肅廟享惟清

迎俎酌獻

通三錫胤明兩承英太山比一作有赫伊水聞笙宗祧是

寄禮樂其亨嘉辰薦俎以發聲明

送文舞迎武舞

羽籥崇文禮以畢干鉞奮武事將行用捨由來其有致
壯志宣威樂太平

武舞作

綠林熾炎歷黃虞格有苗沙塵驚塞外帷幄命嫖姚七
德干戈止三邊雲霧消寶祚長無極歌舞盛今朝

唐享懿德太子廟樂章

唐書樂志曰神龍初享懿德太子廟樂章
第一迎神第二登歌酌鬯第三迎俎及酌
獻第四送文舞出迎武舞入第五武舞作
第六送神詞同隱廟

迎神

甲觀昭祥畫堂升位禮絕羣后望尊儲貳啓誦懃德莊
丕掩粹伊浦鳳翔緱峰鶴至

登歌酌鬯

譽聞元儲寄崇明兩玉裕雖晦銅樓可想絃誦輟音笙
歌罷響幣帛言設禮容無爽

迎俎酌獻

雍雍盛典肅肅靈祠賓天有聖對日無期飄颻羽服掣
曳雲旗眷言主鬯心乎愴茲

送文舞迎武舞

八音協奏陳金石六佾分行整禮容滄溟赴海還稱少

素月開輪即是重

武舞作

隋季昔云終唐年初啓聖纂戎將禁暴崇儒更敷政威
略靜三邊仁恩覃萬姓

唐享節愍太子廟樂章

唐書樂志曰景雲中享節愍太子廟樂章

第一迎神第二登歌酌鬯第三迎俎及酌

獻第四送文舞出迎武舞入第五武舞作

第六送神詞同隱廟

迎神

儲后望崇元良寄切寢門是仰馳道不絕仙袂雲會靈
旗電晰煌煌而來禮物攸設

登歌酌鬯

灼灼重明仰承元首既賢且哲惟孝與友惟孝雖遠靈
規不朽禮因誠致備絜玄酒

迎俎酌獻

嘉薦有典至誠莫騫畫梁雲亘雕俎星聯樂器周列禮
容備宣依佈如在若未賓天

送文舞迎武舞

邕邕闡化憑文德赫赫宣威藉武功既執羽旄先拂吹
還持玉鉞更揮空

武舞作

武德諒雄雄由來掃寇戎劒光揮作電旗影列成虹霧
廓三邊靜波澄四海同睿圖今已盛相共舞皇風

唐享文恭太子廟樂章

請神

許孟容

觴牢具品管磬有節祝道寅恭神儀昭晰桐珪早貴象
輅追設磬達樂成降歆豐潔

登歌

陳京

歌以德發聲以樂貴樂善名存追仙禮異鸞旌拱脩鳳
鳴合吹神聽皇慈仲月皆至

迎俎酌獻

馮伉

撰日瞻景誠陳樂張禮容秩秩羽舞煌煌肅將滌濯祇
薦芬芳永錫繁祉思深享嘗

送文舞迎武舞

千旄羽籥相虧蔽一進一退殊行綴昔獻三雍盛禮容
今陳六佾崇儀制

亞獻終獻

崔邠

醴齊泛罇彝軒縣動千戚入室優如在升階虔所歷奮
疾合威容定利舒皦繹方崇廟貌禮永被君恩錫

送神

張薦

三獻具舉九旗將旋
追勞表德罷享賓天
風引仙管堂虛畫筵
芳馨常在瞻望悠然

唐享惠昭太子廟樂章

請神

歸登

嘉薦既陳祀事孔明
間歌在堂萬舞在庭
外則盡物內則盡誠
鳳笙如聞歆其潔精

登歌

杜羔

因心克孝位震遺芳賓天道茂軫懷氣分發祇乃祀咳
嘆如聞二歌斯升以詠德薰

迎俎酌獻

李逢吉

既潔酒醴聿陳熟腥肅將震念昭格儲靈展矣禮典薰
然德馨惜惜管磬亦具是聽

送文舞迎武舞

孟簡

喧喧金石容既缺肅肅羽駕就行列緱山遺響昔所聞
廟庭進旅今攸設

亞獻終獻

裴度

重輪始發祥
齒胄方興學
冥然升紫府
鏗爾薦清樂
奠
聿致馨香
在庭紛羽籥
禮成神既醉
髣髴緱山鶴

送神

王涯

威儀畢陳
備樂將闋
苞茅酒縮
臂蕭香徹
宮臣展事
肅
雍在列
迎精送往
厥鑒昭晰

唐武氏崇先廟樂章

武后

先德謙撝冠
昔嚴規節
素超今奉國
忠誠每竭
承家至

孝純深追崇懼乖尊意顯號忍玷徽音既迫王公屢請
方乃俯遂羣心有限無由展敬奠醑每闕親斟大禮虔
申典冊蘋藻敬薦翹襟

唐韋氏褒德廟樂章

唐書樂志曰神龍中中宗為皇后韋氏祖
考立廟曰褒德其廟樂迎神用昭德登歌
用進德俎入初獻用褒德次武舞作亞獻
及送神用彰德詞並內出

昭德

道赫梧宮悲盈萬里爰暢徽烈載敷嘉祀享洽四時規
陳二簋靈應昭格神其戾止

進德

塗山懿戚媯汭宗姻祠筵肇啟祭典方申禮以備物樂
以感神用隆敷叙載穆彝倫

褒德

家著累仁門昭積善瑶篚既列金縣式展

武舞作

昭昭竹殿開奕奕蘭宮啓懿範隆丹掖殊榮闢朱戟六
佾薦徽容三簋陳芳醴萬古覃貽厥分珪崇祖禩

彰德

名隆五嶽秩映三台嚴祠已備睟影方迴

梁太廟樂舞辭

五代會要曰梁開平二年正月太常奏定
享太廟樂迎神舞開平之舞迎俎奏慶肅

之樂酌獻奏慶熙飲福酒奏慶隆送文舞
迎武舞奏慶融亞獻終獻奏慶休唐餘錄
曰梁宗廟樂迎神奏開平舞次皇帝行次
帝盥次登歌獻肅祖奏大合之舞恭祖奏
象功之舞憲祖奏來儀之舞烈祖奏昭德
之舞次飲福次撤豆次送神

開平舞

黍稷馨醑醴清牲牲潔金石鏗恭祀事結皇情神來格

歌頌聲

皇帝行

莫高者天攀躋勿克躋天有方累仁積德祖宗隆之子
孫履之配天明祀永永孝思

帝盟

莊肅蒞事周旋禮容裸鬯嚴潔穆穆雍雍

登歌

於赫我皇建中立極動以武功靜以文德昭事上帝歆

心萬國大報嚴禋四海述職

大合舞

於穆皇祖濬哲維熙美溢中夏化被南陲后稷累德公
劉創基肇興九廟樂合來儀

象功舞

天地合德睿聖昭彰累贈太傅俄登魏王雄名不朽弈
葉而光建國之兆君臨萬方

來儀舞

於赫帝命應天順人亭育品彙賓禮百神洪基永固景
命惟新肅恭孝享祚我生民

昭德舞

肅肅文考源濬派長漢稱誕季周實生昌奄有四海超
彼百王笙鏞迭奏禮物熒煌

飲福

戛玉擬金永頌聲繁絲孤竹和且清靈歆醉止犧象盈
自天降福千萬齡

撤豆

笙鏞洋洋庭燎煌煌明星有爛祝史下堂籩豆斯撤禮
容有章克勤克儉無怠無荒

送神

其降無從其往無蹤黍稷非馨有感必通赫弈令德髣
髴睟容再拜恍惚遐想昊穹

後唐宗廟樂舞辭

唐餘錄曰後唐並用唐樂無所變更唯別

造六室舞辭懿祖室奏昭德之舞獻祖室
奏文明之舞太祖室奏應天之舞昭宗室
奏永平之舞莊宗室奏武成之舞明宗室
奏雍熙之舞

昭德舞

懿彼明德赫赫煌煌名高閭域功著旂常道符休泰運

叶祺一作休祥慶傳萬祀以播耿光

文明舞

帝業光揚皇圖翕赫聖德孔彰神功不測信及豚魚恩
霑動植懿範鴻名傳之萬億

應天舞

晉國肇興雄圖再固黼黻帝道金玉王度皇天無親惟
德是輔載誕英明永光聖祚

永平舞

慶傳寶祚位正瑤圖功宣四海化被八區靜彰帝道動
合乾符千秋萬祀永荷昭蘇

武成舞

崔居儉

艱難王業返正皇唐先天載造却日重光漢紹世祖夏
資少康功成德茂率祀無疆

雍熙舞

盧文紀

仁君御宇寰海謐清運符武德道協文明九功式叙百
度惟成金門積慶玉葉傳榮

漢宗廟樂舞辭

五代史樂志曰漢宗廟酌獻樂舞文祖室

奏靈長之舞德祖室奏積善之舞翼祖室
奏顯仁之舞顯祖室奏章慶之舞高祖室
奏觀德之舞唐餘錄曰高祖追尊四祖廟
且遠引漢之二祖為六室張昭因傅會其
禮乃曰太祖高皇帝創業垂統室奏武德
之舞世祖光武皇帝再造丕基室奏大武
之舞自如其舊而大武即用東平王蒼辭
云

武德舞

明明我祖天集休明神母夜哭彤雲晝興邊豆有踐管
籥斯登孝孫致告神其降靈

靈長舞

天降祥漢祚昌火炎上水靈長建廟社潔烝嘗羅鍾石
儼珩璜陳玉豆酌金觴氣昭感德馨香祇洛汭瞻晉陽
降吾祖福穰穰

積善舞

黍稷斯馨祖德惟明
地告赤帝龜謀大橫
雲行雨施天成地平
造我邦家幹我璿衡
陶匏在御醴盎惟精
或憂或擊載炮載烹
飲福受胙舞降歌迎
滔滔不竭洪惟水行

顯仁舞

運極金行謝天資水德
隆禮神廊時館布政
未央宮詰旦修明祀
登歌答茂功雲輶臨
降久星俎薦陳豐藹
藹沈檀霧鏘鏘環珮
風熒煌昇藻藉盥饗
轉珠櫳尊祖咸

韶備貽孫書軌同京坻長有積宗社享無窮

章慶舞

采恩曉唱難人三牲八簋斯陳霧集瑤階瑱闥香生綺
席華茵珠珮韶璫熠燿羽旄千戚紛綸酌鬯既終三獻
凝旒何止千春阿閣長棲綵鳳郊宮疊奏祥麟赤伏英
靈未泯玄珪運祚重新玉笋犧樽罇醴龍旂鳳轄逡巡
瞻望月游冠冕猶疑蒼野回輪

觀德舞

高廟明禋再啟圖金根玉輅幸神都巢阿丹鳳銜書命
入昴飛星獻寶符王撫薰弦娛赤子忽登仙駕泣蒼梧
薦櫻鶴館茄蕭咽酌鬯金楹劔珮趨星俎雲壘兼魯禮
朱干象箭雜巴渝氤氲龍麝交青瑣髣髴錫鑾下藥珠
薦豆奉觴親玉几配天合祖耀璿樞受釐飲酒皇歡洽
仰俟餘靈泰九區

周宗廟樂舞辭

唐餘錄曰周宗廟樂降神奏肅順皇帝行

奏治順獻信祖室奏肅雍之舞僖祖室奏
章德之舞義祖室奏善慶之舞慶祖室奏
觀成之舞太祖室奏明德之舞世宗室奏
定功之舞酌獻登歌奏感順迎俎奏禮順
飲福奏福順送文舞迎文舞奏忠順武舞
奏善勝撤俎奏禮順送神奏肅順

肅順

我后至孝祇謁祖先仰瞻廟貌夙設宮縣朱弦疏越羽

舞回旋神其來格明祀惟虔

治順

清廟將入袞服是依載行載止令色令儀永終就養空
極孝思瞻望如在顧復長違

肅雍舞

周道載興象日之明萬邦咸慶百穀用成於穆聖祖祇
薦鴻名祀于廟社陳其犧牲進旅退旅皇舞之形一倡
三歎朱絃之聲以妥以侑既和且平至誠潛達介福攸

寧

章德舞

清廟新展嚴禋恭祖德厚人倫雅樂薦禮器陳儼皇尸
列虞賓神如在聲不聞享必信貌惟寅想龍服奠犧樽
禮既備慶來臻

善慶舞

卜世長帝祚昌定中國服四方修明祀從舊章奏激楚
轉清商羅俎豆列簪裳歌纍纍容皇皇望來格降休祥

祝敢告壽無疆

觀成舞

穆穆王國奕奕神功
祀載展明德有融彝樽斯滿簋
簋斯豐紛紜旄羽鏘洋磬鐘或昇或降克和克同孔惠
之禮必肅之容錫以純嘏祚其允恭神保是饗萬世無
窮

明德舞

惟彼岐陽德大流光
載造周室澤及遐荒
於鑠聖祖上

帝是皇廼聖廼神知微知章新廟奕奕豐年穰穰取彼
血膋以往烝嘗黍稷惟馨邇且大房工祝致告受福無
疆

咸順

萬舞咸列三階克清貫珠一倡擊石九成盈觴雖酌靈
坐無形永懷我祖達其孝誠

禋順

旨酒既獻嘉肴乃迎振其鼗鼓絜以鉶羹肇禋肇祀或

炮或烹皇尸儼若保饗是明

福順

新廟弈弈金奏洋洋享于祖考循彼典章清

嘉一作

酤特

滿嘉玉騰光神醉既告帝祉無疆

忠順

稱文既表溫柔德示武須成蹈厲容綴兆疾舒皆應疾
明明我祖樂何窮

善勝舞

五代史樂志曰周廣順元年改郊廟朝會
舞名乃改漢治安為政和之舞振德為善
勝之舞觀象為崇德之舞講功為象成之
舞

聖祖累功福鍾來裔持羽執干舞文不廢

禮順

禮畢祀先香散几筵罷舞干戚收撤豆籩

肅順

樂奏四順福受萬年神歸碧天庭餘瑞煙

樂府詩集卷十二

欽定四庫全書

樂府詩集卷十三

宋 郭茂倩 輯

燕射歌辭

周禮大宗伯之職曰以飲食之禮親宗族
兄弟以賓射之禮親故舊朋友以饗燕之
禮親四方之賓客大行人掌大賓之禮大
客之儀以親諸侯以九儀辨諸侯之命等

諸臣之爵以同邦國之禮而待其賓客上
公饗禮九獻食禮九舉侯伯饗禮七獻食
禮七舉子男饗禮五獻食禮五舉諸侯之
卿各下其君二等大夫士皆如之凡正饗
食則在廟燕則在寢所以仁賓客也儀燕
禮曰工歌鹿鳴四牡皇皇者華笙入奏南
陔白華華黍乃閒歌魚麗笙由庚歌南有
嘉魚笙崇丘歌南山有臺笙由儀遂歌鄉

樂周南閨雎葛覃卷耳召南鵲巢采芣采
蘋此燕饗之有樂也大司樂曰大射王出
入奏王夏及射令奏騶虞詔諸侯以弓矢
舞樂師燕射帥射夫以弓矢舞大師大射
帥瞽而歌射節此大射之有樂也王制曰
天子食舉以樂大司樂王大食三宥皆令
奏鐘鼓漢鮑業曰古者天子食飲必順四
時五味故有食舉之樂所以順天地養神

明求福應也此食舉之有樂也隋書樂志
曰漢明帝時樂有四品其二曰雅頌樂辟
雍饗射之所用則孝經所謂移風易俗莫
善於樂禮記曰揖讓而治天下者禮樂之
謂也三曰黃門鼓吹天子宴羣臣之所用
則詩所謂坎坎鼓我蹲蹲舞我者也漢有
殿中御飯食舉七曲太樂食舉十三曲魏
有雅樂四曲皆取周詩鹿鳴晉荀勗以鹿

鳴燕嘉賓無取於朝乃除鹿鳴舊歌更作
行禮詩四篇先陳三朝朝宗之義又為王
公上壽酒食舉樂歌詩十二篇司律陳頌
以為三元肇發羣后奉璧趨步拜起莫非
行禮豈容別設一樂謂之行禮荀譏鹿鳴
之失似悟昔繆還制四篇復襲前軌亦未
為得也終宋齊已來相承用之梁陳三朝
樂有四十九等其曲有相和五引及俊雅

等七曲後魏道武初正月上日饗羣臣備
列宮懸正樂奏燕趙秦吳之音五方殊俗
之曲四時饗會亦用之隋煬帝初詔祕書
省學士定殿前樂工歌十四曲終大業之
世每舉用焉其後又因高祖七部樂乃定
以為九部唐武德初讌享承隋舊制用九
部樂貞觀中張文收造讌樂於是分為十
部後更分讌樂為立坐二部天寶已後讌

樂西涼龜茲部著錄者二百餘曲而清樂
天竺諸部不在焉

晉四廂樂歌

傅玄

晉書樂志曰晉初食舉亦用鹿鳴至武帝
泰始五年使傅玄荀勗張華各造正旦行
禮及王公上壽酒食舉樂歌詩後又詔成
公綏亦作焉傳玄造三篇一曰天鑒正旦
大會行禮歌二曰於赫上壽酒歌三曰天

命食舉東西廂歌

正旦大會行禮歌

天鑒有晉世祚聖皇時齊七政朝此萬方鐘鼓斯震九
賓備禮正會在朝穆穆濟濟煌煌三辰實麗於天君后
是象威儀孔虔率禮無愆莫非邁德儀刑聖皇萬邦惟
則

天鑒四章章四句

上壽酒歌

於赫明明聖德龍興三朝獻酒萬壽是膺敷佑四方如
日之升自天降祚元吉有徵

於赫一章八句

食舉東西廂歌

天命大晉載育羣生於穆上德隨時化成自祖配命皇
皇后辟繼天創業宣文之績丕顯宣文先知稼穡克恭
克儉足教足食既教食之弘濟艱難上帝是佑下民所
安天祐聖皇萬邦來賀雖安勿安乾乾匪暇乃正丘郊

乃定冢社廡廡作宗光宅天下惟敬朝饗爰奏食舉盡
禮供御嘉樂有序樹羽設業笙鏞以間琴瑟齊列亦有
箎塤喤喤鼓鐘鎗鎗磬管八音克諧載夷載簡既夷既
簡其大不禦風化潛興如雲如雨如雲之覆如雨之潤
聲教所暨無思不順教以化之樂以和之和而養之時
惟邕熙禮慎其儀樂節其聲於鑠皇繇既和且平

天命十三章章四句

晉四廂樂歌

荀勗

晉書樂志曰魏杜夔傳舊雅樂四曲一曰
鹿鳴二曰騶虞三曰伐檀四曰文王皆古
聲辭及太和中左延年改夔騶虞伐檀文
王三曲更自作聲節其名雖同而聲實異
唯因夔鹿鳴全不改易每正旦大會太尉
奉璧羣后行禮東廂雅樂郎作者是也後
又改三篇第一曰於赫篇詠武帝聲節與
古鹿鳴同第二曰巍巍篇詠文帝用延年

所改騶虞聲第三曰洋洋篇詠明帝用延年所改文王聲第四曰日復用鹿鳴鹿鳴之聲重用而除古代檀古今樂錄曰漢故事上壽用四會曲魏明帝青龍二年以長笛食舉第十一古大置酒曲代四會又易古詩名曰羽觴行用為上壽曲施用最在前鹿鳴以下十二曲名食舉樂而四會之曲遂廢宋書樂志曰晉荀勗造正旦大會

行禮歌四篇一曰於皇當於赫二曰明明
當巍巍三曰邦國當洋洋四曰祖宗當鹿
鳴王公上壽酒歌一篇曰踐元辰當羽觴
行食舉樂東西廂歌十二篇一曰煌煌當
鹿鳴二曰賓之初筵當於穆三曰三后當
昭昭四曰赫矣當華華五曰烈文當朝宴
六曰猗歟當盛德七曰隆化當綏萬邦八
曰振鷺當朝朝九曰翼翼當順天十曰既

宴當陟天庭十一曰時邕當參兩儀十二

曰嘉會

正旦大會行禮歌

於皇元首羣生資始履端大享敬御繁祉肆覲羣后爰
及卿士欽順則元允也天子

於皇一章八句

明明天子臨下有赫四表宅心惠浹荒陬柔遠能通孔
淑不逆來格祈祈邦家是若

明明一章八句

光光邦國天篤其祐丕顯哲命顧柔三祖世德作求
有九土思我皇度彝倫攸序

邦國一章八句

惟祖惟宗高朗緝熙對越在天駿惠在茲聿求厥成
我皇崇之式固其猶往敬用治

祖宗一章八句

王公上壽酒歌

踐元辰延顯融獻羽觴祈令終我皇壽而隆我皇茂而
嵩本枝奮百世休祚鍾聖躬

踐元辰一章八句

食舉樂東西廂歌

煌煌七曜重明交暢我有嘉賓是應是貺邦政既圖接
以大饗人之好我式遵德讓

煌煌一章八句

賓之初筵藹藹濟濟既朝乃宴以洽百禮頒以位叙或

廷或陞登儋台叟亦有兄弟胥子陪寮憲茲度楷觀頤
養正降福孔偕

賓之初筵一章十二句

昔我三后大業是維今我聖皇焜耀前暉奕世重規明
照九畿思緝用光時罔有違陟禹之跡莫不來威天被
顯祿福履是綏

三后一章十二句

赫矣太祖克廣明德廓開宇宙正世立則變化不經民

無瑕慝創業垂統兆我晉國

赫矣一章八句

烈文伯考時惟帝景夷險平亂威而不猛御衡不迷皇
塗煥炳七德咸宣其寧惟永

烈文一章八句

猗歟盛歟先皇聖文則天作孚大哉惟君慎徽五典帝
載是勲文武發揮茂建嘉勲修己濟治民用寧殷懷遠
燭幽玄教氛氲善世不伐服事三分德博化隆道冒無

垠

猗歟一章十六句

隆化洋洋帝命溥將登我晉道越惟聖皇龍飛革運臨
燾八荒睿哲欽明配蹤虞唐封建厥福駿發其祥三朝
習吉終然允臧其臧惟何總彼萬方元侯列辟四嶽蕃
王時見世享率茲有常旅揖在庭嘉客在堂宋衛既臻
陳留山陽我有賓使觀國之光貢賢納計獻璧奉璋保
祐命之申錫無疆

隆化一章二十八句

振鷺于飛鴻漸其翼京邑穆穆四方是式無競惟人王
綱允敕君子來朝言觀其極

振鷺一章八句

翼翼大君民之攸暨信理天工惠康不匱將遠不仁訓
以淳粹幽明有倫俊乂在位九族既睦庶邦順此開元
布憲四海鱗萃協時正統殊塗同致厚德載物靈心隆
貴敷奏謹言納以無諱樹之典象誨之義類上教如風

下應如升一人有慶羣萌以遂我后宴喜令問不墜

翼翼一章二十六句

既宴既喜翕是萬邦禮儀卒度物有其容晰晰庭燎煌
煌鼓鐘笙磬詠德萬舞象功八音克諧俗易化從其和
如樂庶品時邕

既宴一章十二句

時邕斌斌六合同塵往我祖宣威靜殊鄰首定荆楚遂
平燕秦亶亶文皇邁德流仁爰造草昧應乾順民靈瑞

告符休徵響震天地弗違以和神人既戡庸蜀吳會是
賓肅慎率職格矢來陳韓濊進樂均協清鈞西旅貢獒
扶南效珍蠻裔重譯玄齒文身我皇撫之景命惟新

時筵一章二十六句

愔愔嘉會有聞無聲清酤既奠籩豆既饗禮充樂備簫
韶九成愔樂飲酒酣而不盈率土歡豫邦國以寧王猷
允塞萬載無傾

嘉會一章十二句

晉四廂樂歌

張華

王公上壽詩

稱元慶奉壽觴后皇延遐祚安樂撫萬方

食舉東西廂樂詩

明明在上丕顯厥繇翼翼三壽蕃后惟休羣生漸德六合承流三正元辰朝慶鱗萃華夏奉職貢八荒覲殊類
黻冕充廣庭鳴玉盈朝位

濟濟朝位言觀其光儀序既以時禮文煥以彰思皇享

多祐嘉樂永無央

九賓在庭臚讚既通升瑞奠贄乃侯乃公穆穆天尊隆
禮動容履端承元吉介福御萬邦

朝享上下咸雍崇多儀繁禮容舞盛德歌九功揚芳烈
播休蹤

皇化洽洞幽明懷柔百神輯祥禎潛龍躍雕虎仁儀鳳
鳥屆游麟枯蠹榮竭泉流菌芝茂枳棘柔和氣應休徵
弦協靈符彰帝期綏宇宙萬國和昊天成命賚皇家賚

皇家

世資聖哲三后在天啟鴻烈啓鴻烈隆王基率土謳吟
欣戴于時恒文象代氣著期

泰始開元龍升在位四隤同風變寧殊類五位來備嘉
生以遂凝庶績臻大康申繁祉脣無疆本枝百世繼緒
不忘繼序不忘休有烈光永言配命惟晉之祥

聖明統世篤皇仁廣大配天地順動若陶鈞玄化參自
然至德通神明清風暢八極流澤被無垠

於皇時晉奕世齊聖惟天降嘏神祇保定弘濟區夏允
集大命大命既集光帝猷大明重曜鑒六幽聲教洋溢
惠溥流移風俗多士盈朝賢俊比屋敦世心斷彫反素
樸反素樸懷庶方干戚舞階庭疏狄悅遐荒扶南假重
譯肅慎襲衣裳雲覆雨施德洽無疆旁作穆穆仁化翔
朝元日賓王庭承宸極當盛明衍和樂竭祇承仰嘉惠
懷德馨游淳風泳淑清協億兆同歡榮建皇極統天位
運陰陽御六氣殷羣生成性類王道浹治功成人倫序

俗化清虔明祀祇三靈崇禮樂式儀型

慶元吉宴三朝播金石詠冷蕭奏九夏舞雲韶邁德音
流英聲八絃一六合寧六合寧承聖明王澤洽道登隆
綏函夏總華戎齊德教混殊風混殊風康萬國崇夷簡
尚敦德弘王度遠遐則

正旦大會行禮詩四首

於赫皇祖迪哲齊聖經緯大業基天之命克開洪緒誕
篤天慶旁濟襄倫仰齊七政

烈烈景皇克明克聰靜封畧定勲功成民立政儀刑萬
邦式固宗軌光紹前蹤

允文烈考濬哲應期參德天地比功四時大亨以正庶
績咸熙肇啟晉宇遂登皇基

明明我后玄德通神受終正位協應天人容民厚下育
物流仁躋我王道輝光日新

晉四廂樂歌

王公上壽酒歌

上壽酒樂未央大晉應大慶皇帝永無疆

正旦大會行禮歌

成公綏

穆穆天子光臨萬國多士盈朝莫匪俊德流化罔極王
猷允塞嘉會置酒嘉賓充庭羽旄曜辰極鐘鼓振太清
百辟朝三朝或或明儀形濟濟鎗鎗金聲玉振

禮樂具宴嘉賓眉壽祚聖皇景福惟日新羣后戾止有
來雍雍獻酬納贄崇此禮容豐肴萬俎旨酒千鍾嘉樂
盡宴樂福祿咸攸同

樂哉天下安寧道化行風俗清
簫韶作詠九成年豐穰
世泰平至治哉樂無窮元首
聰明股肱忠澍豐澤揚清
風

嘉瑞出靈應彰麒麟見鳳凰
翔醴泉湧流中唐嘉禾生
穗盈箱降繁祉祚聖皇承天
位統萬國受命應期授聖
德四世重光宣開洪業景克
昌文欽明德彌章肇啟晉
邦流祚無疆

奉始建元鳳凰龍興龍興伊
何享祚萬乘奄有八荒化

育黎蒸圖書煥炳金石有徵德光大道熙隆被四表格
皇穹奕奕萬嗣明明顯融高朗令終保茲永祚與天比
崇

聖皇君四海順人應天期三葉合重光泰始開洪基明
曜參日月功化侔四時宇宙清且泰黎庶咸雍熙善哉
雍熙

惟天降命翼仁祐聖於穆三皇載德彌盛總齊璇璣光
統七政百揆時序化若神聖四海同風興至仁濟民育

物擬陶鈞擬陶鈞垂惠潤皇皇羣賢峨峨英雋德化宣
芬芳播來肩播來肩垂後昆清廟何穆穆皇極闢四門
皇極闢四門萬機無不綜亶亶翼翼樂不及荒饑不遑
食大禮既行樂無極

登崑崙上會城乘飛龍升泰清冠日月佩五星揚虹蜺
建萼旌披慶雲陰繁榮覽八極遊天庭順天地和陰陽
序四時曜三光張帝網正皇綱播仁風流惠康
邁洪化振靈威懷萬方納九夷朝閭闔宴紫微

建五旗羅鐘虞列四縣奏韶武鏗金石揚旌羽縱八佾
巴渝舞詠雅頌和律呂于胥樂樂聖主

化蕩蕩清風泄總英雄御俊傑開宇宙掃四裔光緝熙
美聖哲超百代揚休烈流景祚顯萬世

皇皇顯祖翼世佐時寧濟六合受命應期神武鷹揚大
化咸熙廊開皇衢用成帝基

光光景皇無競惟烈匡時拯俗休功蓋世宇宙既康九
域有截天命降鑒啟祚明哲



穆穆烈考克明克雋實天生德誕膺靈運肇建帝業開
國有晉載德奕世垂慶洪肩

明明聖帝龍飛在天與靈合契通德幽玄仰化青雲俯
育重淵受靈之祐於萬斯年

晉冬至初歲小會歌

張華

日月不留四氣回周節慶代序萬國同休庶尹羣后奉
壽升朝我有嘉禮式宴百僚繁肴綺錯旨酒泉淳笙鏞
和奏磬管流聲上隆其愛下盡其心宣其壅滯詠之德

音乃宣乃訓配享交泰永載仁風長撫無外

晉宴會歌

張華

亶亶我皇配天垂光留精日昃經覽無方聽朝有暇延
命衆臣冠蓋雲集樽俎星陳肴蒸多品八珍代變羽爵
無算寃樂極宴歌者流聲舞者投袂動容有節絲竹並
設宣暢四體繁手趣摯懽足發和酣不忘禮好樂無荒
翼翼濟濟

晉中宮所歌

張華


先王統大業玄化漸八維儀刑乎萬邦內訓隆壺闈皇
英垂帝典大雅詠三妃執德宣隆教正位理厥機含章
體柔順帥禮蹈謙祇螽斯宏慈惠樛木逮幽微徽音穆
清風高義邈不追遺榮參日月百世仰餘暉

晉宗親會歌

張華

族燕明禮順餽食序親親骨肉散不殊昆弟宣他人本
枝篤同慶棠棣著先民於皇聖明后天覆弘且仁降禮
崇親戚旁施協族姻式宴盡酣娛飲御備羞珍和樂既

宣洽上下同歡欣德教加四海敦睦被無垠



樂府詩集卷十三